

Tugtupitsip nunatsinni pinneraasiassatut pisortatigoortumik nunatta ujaraatut toqqarneqarnissaanik kiisalu pilersaarummik aammalu avammut niuernermit ussassaarusiornissamat periusissiamik UPA 2020-imut saqqummiusseqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut. Inuit Kalaallit Nunaanni najugaqavissut ujaqqanik pinneraasiassanik suliaqarnerminni aningaasaqarnerisa siuarsarneqarnissaat matumani suliniuteqarnermi siunertarineqarpoq.

(Inatsisartunut ilaasortaq Múte Bourup Egede, Inuit Ataqtigiit)

Akissuteqaat

(Aatsitassanut Suliffeqarnermullu Naalakkersuisoq)

Siullermeerneqarnera

Inatsisartunut ilaasortaq, Múte Bourup Egede, Inuit Ataqtigiit, aalajangiiffigisassatut siunnersuuteqarneranut Naalakkersuisuinit qutsavigaarput. Siunnersuut tunngaviatigut, nunaqavissut ujaqqanik pinneraasiassanik avammut nioqquteqarnissamat periarfissaanik siuarsaanissamik Naalakkersuisut kissaateqarnerannut naapertuuppoq.

Eqqorpoq tugtupitsit qaffasissumik pitsaassusillit nunani allani soqutigineqaleriartortut. Taamaattumik tugtupitsinik peqarfiit nunap assiliornissaat siunertaralugu, Aatsitassanut Suliffeqarnermullu Naalakkersuisoqarfik 2018-imi suliniuteqarluni aallartippoq. Nunap assiliorluni suliaqarnissap taassuma ilaatut 2019-imi aasaanerani Kujataani asimi suliaqarneq ingerlanneqassaaq. Nunap assiliorluni suliaqarnermit inassuteqaatigineqartut ilaatigut tugtupitsinut immikkut avammut niuernikkut nittarsaassinermik suliaqartoqassanersoq aalajangiinissamat tunngavissaliissapput. Tugtupitsi nunatta ujaraatut nunatsinni pinneraasiassatut toqqarneqassanersoq, suliassaq allaavoq.

Maannakkut tugtupitseqarfiit qanoq killeqartigisut, aasaq nunap assiliornerup kingorna oqaatigineqartariaqarpoq uppersarneqartariaqarlunilu. Peqarfiit pillugit ilisimasat pigineqartut paasinarsisippaat, sumiiffiit tugtupitseerutilerlutik killeqartut annikitsullu.

Taamaattoq tugtupitsi ujaqqat pinneraasiassat kusanartut immikkuullarissullu nunatsinni pigisatta ilagiinnarpaat, aammalu Kalaallit Nunaata ujaraatut nunatsinni pinneraasiassatut taaguuteqalernissamat piukkunnartunik allanik peqarpoq. Paasissutissanik tunngaveqarluni nunatta ujaraa nunatsinni pinneraasiassaq pillugu aalajangiinissaq pingaaruteqarpoq. Taamatut aalajangiinissaq sioqqullugu piukkunnartut assigiinngitsut erseqqinnerusumik misissorneqartariaqarput, aammalu ujaqqat piareersimasuutigineqartut qanoq annertutigisutut missingersorneqarsimanersut, niuerfimmi suut ujartorneqartarnersut aammalu ujarak pinneraasiassaq sorleq Kalaallit Nunaannut iluaqutaanerusussaanersoq minnerpaamik misissorneqartariaqarput. Tassani aamma taamatut aalajangiisoqannginnerani innuttaasut aamma annikitsumik aatsitassarsiornissamat pisinnaatitsissummik pigisaqartut akuutinneqarpata naleqqutissaaq.

Kalaallit Nunaanni sumiiffinni assigiinngitsuni ujaqqanik pinneraasiassanik immikkuullarissunik asseqanngitsunik peqartoq, aammalu taakkua annertussutsimikkut killeqarsinnaasut, Naalakkersuisut tassunga atatillugu eqqumaffigisorujussuuaat. Nunatta ujaraanik nunatsinni pinneraasiassamik toqqaanermut atatillugu, sumiiffiit taakkua tamarmik immikkut tamannaannaq tunngavigalugu, nunatta ujaraatut nunatsinni pinneraasiassatut taagorneqarnissamut piukkunnarsinnaapput.

Tamanna tunngavigalugu siunnersuut itigartinneqassasoq Naalakkersuisut inassutigaat.